

四庫全書

集部

欽定四庫全書

集部

靜修集卷十五至十

詳校官中書臣徐志晉

侍讀臣孫球覆勘

覆校官中書臣汪學金

校對官中書臣蔣寬

謄錄舉人臣李逢泰

欽定四庫全書

靜修集卷五

丁亥集五

元 劉因 撰

五言絕句

三十七首

明珠穴

珠從何處來秀與天地生涵蘊幾千古得此風露聲

滴水龕

膚寸徧天下至靜涵氤氲因看石滴水窺見天生雲

石潭

清不見羣魚暗不藏
毒怪觀物得吾師
終日欲相對

春日

游絲困無力
欲起重悠颺
芳草落花滿
相思春晝長

慎獨

一葉下秋水
微波去不停
望中猶隱隱
直欲到滄溟

毀譽

子賤波及魯
犁牛不累驛
寸心仁厚處
萬物自生成

偶書

意當極快處心有平時少忍容無害欲言當再思

夢中作

溪童望水滿日夜愁不已雖非鷗鷺身亦有相關意

觀化

風雨何方來呼童出門望歸報是羣蜂聲在庭花上

四皓圖

雖戀紫芝美難忘帝力深驅馳恨臣老高尚豈初心

石鼎聯句圖

玩世如一鼎姓名誰得聞仙翁應自笑知我有鄒忻

白樂天琵琶行圖

冀馬嘶寒風逐臣念鄉國江浦聞哀絃長吟望南北

百蝶圖

芳蝶具百種幽花散紅翠道人觀物心一一見春意

子期聽琴圖

琴瑟自吾事何求人賞音絕絃真俗論不是古人心

村居雜詩

五首

隣翁走相報，隔窓呼我起。
數日不見山，今朝翠如洗。
黃昏雨氣濃，喜色滿南畝。
誰知一夜風，吹放門前柳。
獨立偶懷古，臨風還自傷。
一聲樵唱起，回首暮山蒼。
削樹題詩句，畫沙知酒籌。
他年成故事，蕭散更風流。
芳茵皆可藉，緩步即吾車。
乘興三杯酒，隨行一策書。

夢題村舍壁上

已卯正月三日

村居有何樂，所樂人真淳。
回看城市中，居此勝買隣。

屏上草蟲

四首

螳螂

逢物即能產其滋乃爾蕃不知何所積擬欲問乾坤

蝸牛

背上穹廬好問蟲誰汝施始知天地內棟宇匪人為

螻蛄

後利前還滯陰陽體段今不須觀兔尾即此見羲文

螽斯

陽施陰專受精醇物始真虫魚寧解此聊用比振振

飲山亭雜花卉

八首

牡丹

世變日以文花卉亦應爾懸知太古時其美未如此

芍藥

宜致美人贈服之良有功分形雖異種氣類暗相通

薔薇

色染女真黃露凝天水碧花開日月長朝暮閱兩國

萱草

丹鳳忽飛來喜色滿朝露何以稱此花白頭戲嬰孺

夜合

消忿緣無獨合昏如識時韋絃千古意百統惜芳枝

酴醾

勿翦架上花不是畏多刺得蔭難忘枝曾向花陰醉

木槿

已拆暮欲落未榮朝又花生生如體道堪玩不堪嗟

蜀葵

且勿論傾陽色香尤可喜人情輕所多共愛姚黃美

看雪

雪花不擇地隨風恣飄蕩數片如有情飛落梅梢上

題山水扇

二首

山近雨難暗樓高秋易寒憑誰暮雲表添我倚闌干

二山環合一水中有老木參天不著幽人草閣誰收無

限雲烟

山亭獨坐

二首

野情靜成癖幽居懶自高青山卧床下初不厭人豪
愛玩不能去山靜雲卷舒敲門者誰子聊復忍斯須

七言絕句

九十四首

臘盡

小雪初晴臘盡時無窮梅柳怨開遲人間不覺春來早
只有吾家布被知

讀史評

紀錄紛紛已失真語言輕重在詞臣若將字字論心術

恐有無邊受屈人

試筆

得意好花開易落惱人芳草燒還生亂多治少君知否
陰偶陽奇理自明

山中客夜

鞍馬南州五日程豈知物外有茅亭塵埃暑困人如醉
月露夜涼天亦醒

抱陽南軒

下瞰縣崖老木稠輕風毛髮散涼秋蒼苔白石夢初覺
霽月疎雲山欲流

喜雨書事

雨晴物物自生春喜氣浮空似有紋吾亦乾坤物中一
相看草樹共欣欣

前日南湖枕白雲蛙聲每厭靜中聞今朝便覺笙歌上
為是多年不聽君

九日九飲

九首擬橫渠
元日十詠體

一飲君聽第一歌誰知此際見天和醉鄉開物功夫密
春意空濛尚未多

二飲重賡第二歌春風毛髮欲婆娑寸心又到欣然處
莫怪山人語漸多

三飲山人笑且歌羲皇相去已無多舉杯為向諸君道
自此光陰奈樂何

四飲須歌第四歌山人未醉覺顏酡屬君輕摘黃花露
滴向杯心生小波

五飲初喧四座歌黃花滿意入紅螺人間此樂知無復
魚鳥聞聲亦太和

六飲相將醉景過令巖斟淺欲如何秋香正滿黃花萼
宜與南山細拊摩

七飲人驚飲量多兒童休唱接羅歌青山一帽千年在
只恐西風不奈何

八飲人驚飲量過劇談不記竟云何杯中正有春風在
無奈蕭蕭落葉多

九飲蒼崖藉翠蓑江山搖落奈吾何乾坤閑物胚胎密
中有山人第九歌

山行

西崦人家竹映溪山深雨暗到來遲行窮谷口水才見
流盡巖花春不知

銅雀瓦硯

諸侯負漢已堪憐直筆何為亦魏編却愛曹瞞臺上瓦
至今猶屬建安年

春曉

要看東風氣象新
登臨何處不尋春
今朝烟雨細如霧
生意空濛畫得真

以杖畫雪偶成

玉華銀色皓無瑕
方寸居然得故家
雲重風輕晴不快
暮寒覺比晚來加

仙人圖

三首

千古誰傳海上山
坐令人主厭塵寰
蓬萊果有神仙在

應悔虛名落世間

雲海蒼茫去復還
人間此日是何年
平生慣見秋風客
只許汾陽會宿然

悵望皇墳寂寞中
何從事跡得空同
可憐千古稱黃老
誰識當年立極功

春景

病餘身世淡無情
但覺春來暖漸生
送客出門花已謝
問知昨日是清明

講學而首章

二首

有樂如從天上来春風過處百花開政教萬木夜僵立
何害孤根暖獨回

人將知我亦何從天在吾家度量中此語誤人君勿信
我心無愠本冲融

講八佾首章

二首

以忍傷肌手自危割餘痛切不勝悲心同義理元無間
從此俱看未忍時

生意條然不遂春根株盤屈欲輪囷向前枝葉頑然了
自此乾坤屬不仁

講周而不比章

義理胸中好惡真初非由己與由人試看生意流行在
惟有枯爻不受春

講人之生也直章

朝綱一紊國風沉人道方乖鬼道侵生理本直宜細玩
著龜千古在人心

驕客

昨日深山興未闌今朝二女共高寒
施施便解驕妻妾乞態當從此際看

講求仁得仁章

二首

山下食薇老興便荆南採藥此心全
乾坤月慘烟愁外留我羲皇萬古天

荆棘埋香死不禁清泉芳徑愜幽尋
移花旋看新生意方識西山忍餓心

一元

萬古堂堂共一元欲於何處覓天根試從開閉中間看
始覺乾元獨自尊

閉物之後有玄開物之前有丑
惟子正在開閉之中其象可見

新居

雪擁閑門儘未除小齋人道似禪居年來日歷無多事
只有求方與借書

今月

今月柴關幾客來擬從屐齒數莓苔求文道士花前至

載酒門生雨後回

采栢圖

翠袖重將栢子熏一般心苦為思君思君不為山中苦
為說山中有白雲

采藥

黃精著雨宜深斲栢子經霜可爛收莫道遊人渾懶散
一年忙處是深秋

堯民圖

分得堯天一握多
百年安樂邵家窩
情知弄月吟風手
不扣南山白石歌

風氣初開理漸融
畫圖猶見帝無功
意長世短成何事
誰及乾坤再日中

平生喜作許東隣
百過摩挲畫本昏
聞說詩人多感慨
且休持送鄭監門

幽風圖

三首

畫裡春風在眼前
詩中雅意若為傳
憑誰更譜絃歌了

細味周家八百年

惟願將身入畫中野人何敢夢周公一區共買橫渠上
儘有新詩續正風

采風千古自觀風十室誰言九室空寄語當年長樂老
回頭無忘聶夷中

觀梅有感

東風吹落戰塵沙夢想西湖處士家只恐江南春意減
此心元不為梅花

山家

馬蹄踏水亂明霞
醉袖迎風受落花
怪見溪童出門望
鵲聲先我到山家

溪上

坐久蒼苔如見侵
攜筇隨水就輕陰
松風自厭灘聲小
雲影旋移山色深

偶書

蜜割舊脾花又發
泥生新雨燕方還
一瓢有分吾能足

萬事勞生誰獨開

西郊

偶因訪客出西城一色寒蕪滿意平
行過溪橋嘗脚力招來野老問山名

夏日

庭戶無人綠滿苔
巡簷繞砌菜花開
酒醒夢覺日將午
蜂學遠山風雨來

早秋

昨朝一葉見秋生
今日千巖萬壑清
欲借西風蘓病骨
暫來石上聽松聲

春盡

草閣垂簾晝掩扉
客來知我出門稀
鳥鳴淡與人相對
花落方知春已歸

寒食道中

簪花楚楚歸寧女
荷鋪紛紛上塚人
萬古人心生意在
又隨桃李一番新

行樂有感

未言先嘆少知者有客每憂無可人
偶到塔前見芳草
乾坤何物不歸春

故園寒食

清明酒熟老人醉拜掃歸來壯士耕
此是吾家舊寒食
只今惟有故鄉情

宿山寺

四面雲山消百憂
一方禪榻有真游
月明夢覺不知夜

雨過風生渾是秋

感事

高天厚地古今同
共在人形視息中
四海堂堂皆漢土
誰知流淚在金銅

廢園

路傍雙石立崔嵬
曾見遊人幾往來
想得當年全盛日
好山橫處盡樓臺

記夢

眼中天變暗星文
脚底雷轟震寢門
領取天公仁愛意
此心存處更存存

已卯九月二十八日夢過先妣墓得詩覺而忘
其第三句因足成之

只應老母心酸處
還似孤兒淚盡時
留在此身成底事

回頭二十四年悲

先母下世今
二十四年矣

已卯元日

二首

西湖泣血夜將分
感激無如此念真
四十頭顱今日數

悠悠歲月屬何人

文廟秋風默坐時慨然千古入沉思許身尚省初心在
道在而今竟似誰

庚辰元日

二首

九齡風骨渺翩翩解道沉河觸泰山還使當年見今日
也應拍手笑癡頑

曾記西湖酒一卮乾坤和氣入新詞六年未盡水霜怨

又到春風滿面時

乙亥所作詞有春風花柳消盡水霜殘怨之句

下山 三首

峻嶺崇岡儘意登
要收景致入高明
下山却向山頭望
始覺從前險處行

翠霞騰暈紫成堆
收盡雲烟酒一杯
想見浮嵐在眉宇
人人知道睂山回

十載烟霞望我深
豈期今日恣登臨
此行知有詩多少
還盡山靈未了心

戲判遊山詩卷 三首

不解烟霞調戲君，強將詩思與山親。
苦吟共道西遊樂，林鳥巖花恐笑人。

心境無邊萬象新，直須泉石離風塵。
區區等為紛華役，未分膏肓是達人。

登臨有法莫相誣，絕壑懸崖不信渠。
十步回頭五步坐，窓間眉黛笑君愚。

漫記 三首

夢覺關頭夢已空，此時方識樂無窮。
便將富貴浮雲比，

恐落華歆一擲中

醉知避客猶存禮死不忘骸尚有身一自坡仙生一轉

浮虛十倍晉朝人

坡謂劉伶豈知忘死未忘骸謂淵明醉中對客元何害

安樂名窩有真賞打乖非是要安身坡仙便道學瘖啞

負殺圍中獨樂人

打乖非是要安身道大方能混世塵又云時至時行皆有命先生不是打

乖人明道安樂窩詩也拊掌笑先生年來學瘖啞東坡獨樂園詩也

草亭睡起

萬古乾坤一草亭淡然相對靜儀形釀成碧酒客難得

生出白雲山更清

寒食出郭

衣冠不似逸人高容貌初無達士驕
醉裏騎牛過山北
傍人不信是漁樵

即事

曬罷空庭藥果收
閉門無睡却梳頭
過門幾點黃昏雨
分與蟲聲半霎秋

冬曉

歲寒心事在蒲團清曉開簾試一觀禾稼乍迎紅日影
依稀學似杏花殘

可庵

莫道無衣不可身更從裘葛辨冬春惡乎不可惡乎可
等是無生恐誤人

許由棄瓢圖

堯天萬古大無隣何地容君作外臣莫占箕山最深處
後來恐有避秦人

癸酉書事

嬌兒索栗一錢空，怪見家人不忍中。
我不怨天貧賤我，吾兒自合享吾窮。

米元章雲烟疊嶂圖

二首

筆勢或傳是阿章，短屏山影露微茫。
苦心只辨雲烟好，不抹人呼作米狂。

烟影天機滅沒邊，誰從毫末出清妍。
畫家也有清談樂，到處南華一啞然。

宋理宗南樓風月橫披

二首

試聽陰山敕勒歌朔風悲壯動山河南樓煙月無多景
緩步微吟奈爾何

物理興衰不可常每從氣韻見文章誰知萬古中天月

只辦南樓一夜涼

理宗自題句其上有併作南樓一夜涼之句才到天中萬國明宋太祖月

詩也

題枯木怪石圖

物有常情最奈看看時容易畫時難奇峰怪石驚人眼

誰信丹青解熱謾

探春

道邊殘雪護頽牆
牆外柔絲露淺黃
春色雖微已堪惜
輕寒休近柳梢傍

酬寫真者

自覺形骸已枯槁
何從眉宇尚豪英
筆頭慣畫麒麟像
乍寫山翁似手生

夢中題吟風亭壁

方榮不拆寒為虐已謝重開兩借恩一種是花元不異
多由天氣少由根

題秋景扇頭

嵐光蒼翠山遠近木葉青黃霜重輕萬里晴天秋著色
不魯慘淡入經營

月下

桂華涼冷渺風鬟灝露一天秋意閒不記醉中呼李白
傍人笑道是人間

金太子允恭墨竹 二首

墨竹猶堪驗一斑
金源文物見當年
博山烟暖春闈靜
却笑承乾嗜好偏

手澤明昌秘閣收
當年緹襲為誰留
露盤流盡金人淚
應恨翔鸞不解愁

遊飲山亭 二首

十年種木望成陰
及至成陰礙山色
幾欲砍去心所憐
安得高堂數千尺

山翁一去不復返亭下幽花空自開慙愧茅簷雙燕子
飛鳴猶喜故人來

靜修集卷五

欽定四庫全書

靜修集卷六

蕙菴詞一

元 劉因 撰

酌江月

飲山亭月夕

廣寒宮殿想幽深不覺升沉圓缺天上人間心共遠如
在瓊樓玉闕厚地微茫高天涼冷此際紅塵歇翠陰高
枕併教毛骨清徹為問此世從來幾人嗟望轉首俱湮
滅蟣虱區區尤可笑幾許肝腸如鐵八表神遊一槎高
泛逸興方超絕嫦娥留待桂花且莫開徹

王漏遲

沉舟東溪

故園平似掌人生何必武陵溪上三尺蓑衣遮斷紅塵
千丈不學東山高卧也不似鹿門長往君試望遠山巔
處白雲無恙自唱一曲漁歌當無復當年缺壺悲壯
老境羲皇換盡平生豪爽天設四時佳興要留待幽人
清賞花又放滿意一篙春浪

鵲橋仙

悠悠萬古茫茫天宇自笑平生豪舉元龍儘意卧床高

渾占得乾坤幾許公家租賦私家雞黍學種東臯烟雨
有時抱膝看青山卻不是吟梁甫

二 喜雨

紆千生處幾時飛去欲去被天留住野人得飽更無求
滿意一犁春雨田家作苦濁醪釀黍准脩歲時歌舞不
妨分我一豚蹄更試聽今秋社鼓

木蘭花

未開常探花開未又恐開時風雨至花開風雨不相妨

說甚不來花下醉百年枉作千年計今日不知明日事
春風欲勸坐中人一片落紅當眼墜

二

西山不似龐公傲城府有樓山便到欲將華髮染晴嵐
千里青青濃可掃人言華髮因愁早勸我消愁惟酒好
夜來一飲盡千鍾今日醒來依舊老

三

錦雲千里川妃共一棹晚涼風歎送只愁無處著清香

滿載月明船已重
冰壺水鑑元空洞
天意似嫌紅翠擁
拚教風露入吟尊
不惜秋光渾減動

菩薩蠻

元龍未減當年氣
呼山卧向高樓底
今日到山村
青山故意昏商歌
聊一振千里浮雲
靜老子氣猶豪
山靈未可驕

二 飲山亭感舊

種花人去花應道
花枝正好人先老
一笑問花枝
花枝

得幾時人生行樂耳今古都如此急欲醉莓苔前村酒
未來

三
回文

水園山影紅圍翠圍紅影山園水西近水橋溪溪橋
水近西隱人誰與問問與誰人隱孤鶴對言無無言對
鶴孤

清平樂

青松偃蹇不受春風管松下幽人心自遠驚怪人間日

短微茫雲海蓬萊千年一度春來爭信門前桃李年年
花落花開

二

青天仰面卧看浮雲卷蒼狗白衣千萬變都被幽人窺
見偶然夢見華胥覺來花影扶疎窓下魯論誰誦呼來
共詠舞雩

三 飲山亭留宿

山翁醉也欲返黃茅舍醉裡忽聞留我者說道羣花未

謝脫巾就卧松龕覺來詩思方酣欲借白雲為筆淋漓
洒遍晴嵐

四 賀雨

雨晴簫鼓四野歡聲舉平昔飲山今飲雨來就老農歌
舞半生負郭無田寸心萬國豐年誰識山翁樂處野花
啼鳥欣然

五 圍棋

棋聲清美盤礴青松底門外行人搔指似好箇爛柯仙

子輸贏都付欣然興闌依舊高眠山鳥山花相語翁心
不在棋邊

人月圓

自從謝病脩花史天意不容閒今年新授平章風月檢
校雲山門前報道麴生來謁子墨相看先生正爾天張
翠蓋山擁雲鬟

二

茫茫大塊洪爐裏何物不寒灰古今多少荒烟廢壘老

樹遺臺太山如礪黃河如帶等是塵埃不須更嘆花開
花落春去春來

太常引

男兒勲業古來難嘆人世幾千般一夢覺邯鄲好看
得浮生等閒紅塵盡處白雲堆裡高卧對青山風味似陳
搏休錯比當年謝安

二

臨流相喚百東坡君試舞我當歌不樂欲如何看白髮

今年漸多青天白日斜風細雨盡付一漁簑天地作行
窩把萬物都名太和

三

冥鴻有意避雲羅問何處是行窩今古一漁簑收攬了
閒人最多求田問舍君休嘆我兩鬢已成皤髀肉儘消
磨渾換得功名幾何

風中柳

飲山亭留宿

我本漁樵不是白駒空谷對西山悠然自足北窓疎竹

南窓叢菊愛村居數間茅屋風煙草屨滿意一川平綠
問前溪今朝酒熟幽禽歌曲清泉琴筑欲歸來故人留
宿

西江月

飲山亭留飲

看竹何須問主尋村遙認松蘿小車到處是行窩門外
雲山屬我張叟臆醅藏久王家紅藥開多相留一醉意
如何老子掀髯曰可

靜修集卷六

欽定四庫全書

靜修集卷七

遺文一

元 劉因 撰

雜著

唯諾說

唯恭於諾何也曰各有所施也呼之則其音必內故唯以趨赴之若取物而奉之也命之則其聲必外故諾以承受之若與物而受之也失其所施則文理從而亂矣豈但是乎凡物無無對者無無陰陽者而聲亦然其意

象之清濁闔闢亦莫不合也姑以進退存亡吉凶消長
體之則可見矣此天機之所發而禮樂之所由生雖天
地亦不知其所以然者豈但人乎物之聲亦然豈但聲
乎凡形色氣味皆然也而況古今之時變事物之倫理
聖人何嘗加損於其間哉雖然妙此理而宰此事者心
焉而已矣必盡夫心也然後聲為律而身為度苟為不
然幾何其不為無適非道之道作用是性之性也

唯諾後說

天之聲清而上地之聲濁而下形感而聲出焉理於是乎在來之聲必來去之聲必去事感而聲出焉理亦於是乎在初無心曰天地去來也至於一草一木其聲亦必象其形曰樹有植立之象焉曰枝有散殊之象焉至於曰鵠曰鴨曰鷄曰雀曰鴉之類則又因其聲而聲焉者也鵠鵠所以協鵠也喈喈所以協鷄也言語生於有聲之後而其理具於有聲之前有聲之後則古今方域日益不同人惟見其不同而不知其同也知其同則知

吾之所以說唯諾者不但說唯諾也授坐而立授立而跪齟齬於其形也當唯而諾當諾而唯齟齬於其聲也聖人之所以制禮者非誠有制也特知之焉爾

櫝著記

著之在櫝也寂然不動道之體立所謂易有太極者也及受命而出也感而遂通神之用行所謂是生兩儀兩儀生四象四象生八卦八卦定吉凶吉凶生大業者也猶之圖也不用五與十不用云者無極也而五與十則

太極也猶之易也潔靜精微潔靜云者無極也而精微則太極也知此則知夫櫝中之著以一而具五十無用而無所不用謂之無則有謂之實則虛也而其數之流行於天地萬物之間者則亦陰陽奇偶而已矣故自掛扐之奇而十二之則陽奇而進之不及夫偶者為少陰陰偶而退之不及夫奇者為少陽而四之則三四五六合夫畫奇全偶半合夫數而畫亦於是焉合其多少則合其位之陽少而陰多故有自一進一而為偶自偶退

一而為奇之象也自過揲之策而十二之陽奇而退之
不及夫偶者為少陰陰偶而進之不及夫奇者為少陽
而四之則六七八九合夫數奇三偶二合夫畫而數亦
於是焉合其多少則合其數之陽實而陰虛故有自一
虛中而為偶自二實中而為奇之象也蓋掛扚之奇徑
一而過揲之奇圍三而掛扚過揲之偶鈞用半也故分
掛扚過揲而橫觀之則以陰為基而消長有漸分四象
而縱觀之則亦以陰為平而低昂有漸其十二之則自

右一而二自左二而三其四之則自右三而六自左六而九如水之流行觸東而復西其消長則其自然之淪漪其判合則其盈科而後進者也此皆自夫一行邵子之說而得之知此則知夫誤推一行三文八卦之象謂陰陽老少不在乎過揲者為昧乎體用之相因而誤推邵子去三用九之文謂七八九六不在乎掛扚者又昧乎源委之分也由此而極其奇偶之變以位則陽一而陰二也以數則天三而地兩也初變之徑一而圖三以

為奇者三而得之是以老陽少陰之數多也後二變之
圖四用半以為偶者二而得之是以少陽老陰之數少
也分陰分陽則初一變皆奇而後二變皆偶也迭陰迭
陽則去掛一初一變皆偶而後二變皆奇又如畢中和
天地人之說也其變也自一生二二生四而又四之四
生八八生十六而言則畫卦之象也自四乘而十六十
六乘而六十四則重卦之數也故初變而得兩儀之象
也二畫卦之數也再變而得四象之象者四畫卦之數

也三變而得八卦之象者六畫卦之數也自兩儀之陰陽而言其用數則乾兌離震皆十二而巽坎艮坤皆四也自八卦之陰陽而合其體數則乾坎艮震三十二而巽離坤兌三十二也自二老二少之陰陽而言其饒之之數則又如四象之七八九六也六變而得四象之畫則每位之靜變往來得十畫卦之數也又二畫則總其數矣其數也皆靜者為多變者為少而一爻變者居中其靜與變皆老陰為多老陽為少而二少居中積畫成

卦則每卦之靜變往來得十五畫卦之數也又三畫則總其數矣其數也亦皆靜極者為至多而變極者為至少而又一爻二爻進退于其間其靜與變則皆坤為至多乾為至少而三男三女進退於其間因而重之則每卦之靜變往來得二十畫卦之數也又六畫則總其數矣其進退多少皆與八卦之例同也此皆自歐陽子七八常多九六常少之一言而推之與夫後二變不掛不知其為陰而使二老之數與成卦同二少之數與二老

同而參差益甚其初一變必鈞不知其為陽而於乾坤
六子之率勉強求合乃若四十九著而虛一與五十著
虛一而掛二者固有間矣此以著求卦者也若夫以卦
而求變也則自夫交易已成之體為變易應時之用由
兩儀而上自紓而促八卦循環而其序不亂以遠御近
以下統上而皆有文之可尋也以變而求占也則自靜
極而左之一二三四五自動極而右之一二三四五極
自用其極而一則專其一居兩端而分屬焉二則分其

爻居次兩端而分屬焉動則上爻重而靜則下爻重也
三則分其卦居中自為兩端而分屬焉前則本卦重而
後則之卦重也動中用靜靜中用動靜多主貞動多主
悔而皆有例之可推也然自此而極言之則以六甲納
之其卦之序不亂也以玄取之其序有漸而亦不亂也
以伏求之其序亦有漸而不亂也以世位反圖而推之
則一而二二而四四而八八而十六進退有序逆順以
類而不亂也以策數即圖而攷之則在兩儀而一消長

在四象而二消長在八卦而四消長在十六而八消長在三十二而十六消長故長中八消消中八長皆震為巽之消而坤為乾之消巽為坤之長而乾為震之長而不亂也以揲變之數應圖而推之則其多少又合乎一為乾八八為坤以少為息以多為消而亦不亂也是則按圖畫卦揲耆求卦莫不脗合矣然而朱子猶以大行為不自然於河圖而變揲之左可以形右卦畫之不可以形上者又以為短於龜其三索之說則一行有成

說既取之于本義後復以為不必然而卦之陰陽之奇偶畫與位合則大傳有明文既著之筮說而不明言于啓蒙是又恐後人求之過巧而每遺恨不能致古人之詳也若以奇策之數合之圓圖之畫則四十八一卦之畫也其奇之十二即乾之陰而策之三十六即其陽也三十六自九進而得之也九陽也三十六亦陽也全陽也其奇之二十即兌離之陰也而策之二十八即其陽也二十八自七進而得之也七陽也二十八陰也陽

合於陰也其奇之二十四則坤所去之半也而策則所用之二十四陰也二十四自六進而得之也六陰也二十四亦陰也全陰也其奇之十六即艮坎自上所去之十六也而策之二十二即其所用之半并上所餘之八陰也三十二自八進而得之也八陰也三十二陽也陰合于陽也其震巽之不用則猶乾之不用陰坤之不用陽也其奇策之八方數之變也掛扐之六圓數之變也此邵子之說也然前之奇策之所當陰不若陽之齊後

之六八之所應圓不若方之脩是必有深意也第未能攷而知之又不知朱子之意以為如何此因櫝著而記之至元十年春二月吉日櫝成記

太極圖後記

太極圖朱子發謂周子得於穆伯長而胡仁仲因之遂亦以謂穆特周子學之一師陸子靜因之遂亦以朱錄為有考而潘誌之不足據也蓋胡氏兄弟於希夷不能無少譏議是以謂周子為非止為仲穆之學者陸氏兄

弟以希夷為老氏之學而欲其當謬加無極之責而有
所顧藉於周子也然其實則穆死於明道元年而周子
時年十四矣是朱氏胡氏陸氏不惟不攷乎潘誌之過
而又不攷乎此之過也然始也朱子見潘誌之圖為周
子所自作而非有所受於人也於乾道己丑已序於通
書之後矣後八年記書堂則亦曰不繇師傅默契道體
實天之所畀也又十年因見張詠事有陰陽之語與圖
說意頗合以詠學於希夷者也故謂是說之傳固有端

緒至於先生然後得之於心無所不貫於是始為此圖以發其秘爾又八年而為圖書注釋則復云莫或知其師傳之所自蓋前之為說者乃復疑而未定矣豈亦不攷乎此故其為說之不決於一也而或又謂周子與胡宿邵古同事潤州一浮屠而傳其易書此蓋與謂邵氏之學因其母舊為某氏妾藏其亡夫遺書以歸邵氏者同為浮薄不根之說也然而周子邵子之學先天太極之圖雖不敢必其所傳之出於一而其理則未嘗不一

而其理之出於河圖者則又未嘗不一也夫河圖之中宮則先天圖之所謂無極所謂太極所謂道與心者也先天圖之所謂無極所謂太極所謂道與心者即太極圖之所謂無極而太極所謂太極本無極所謂人之所以最靈者也河圖之東北陽之二生數統夫陰之二成數則先天圖之左方震一離兌二乾三者也先天圖之左方震一離兌二乾三者即太極圖之左方陽動者也其兌離之為陽中之陰即陽動中之為陰靜之根者也

河圖之西南陰之二生數統夫陽之二成數則先天圖之右方巽四坎艮五坤六者也先天圖之右方巽四坎艮五坤六者即太極圖之右方陰靜者也其坎艮之為陰中之動者即陰靜中之為陽動之根者也河圖之奇偶則先天太極圖之所謂陰陽而凡陽皆乾凡陰皆坤也河圖先天太極圖之左方皆離之象也右方皆坎之象也是以河圖水火居南北之極先天圖坎離列左右之門太極圖陽變陰合而即生水火也至元丙子八月

望日靜脩新齋記

節象

渙先陰而後陽也自一陰一陽而二陰二陽也故為渙
焉渙散也節先陽而後陰也自二陽二陰而一陽一陰
也故為節焉節止也以卦之象而言之澤所以限水水
遇澤而止皆節之義也以卦之德而言之方說而遇險
險而以說行之又皆節之義也夫事物之有限而止者
節也而節亦一事物也獨無所謂有限而止之乎知節

而不知節其節焉於彼雖為節於節則為不節也此則節而至於苦者也在物皆有自然之節也若因其節而節焉猶支之有節分之有段亦風行於水自然披離之為渙而已若節而至於苦則非自然之節矣凡卦之所謂亨與貞者其亨與貞皆同而所以為亨與貞則異渙即亨也亨在事先節有亨之道而已亨在事後然易無無貞而亨者猶物之無無陰之陽也亨在事先者其卦以亨為主而守之以貞亨在事後者其卦以貞為主庶

幾其有亨也在渙其辭有聚渙之象焉在節其辭有苦
節之戒焉渙非必渙也節非必節也未節則思所以節
焉已節則思戒其所以苦節者焉動久而以靜節之靜
久而以動節之皆所以為節也知此則知其所謂亨與
貞者亦隨所遇而變也夫人遇節當以彖辭占故為言
其義例之大略焉

己卯春釋菜先聖文

聖代天言明告萬世寥寥方冊孰傳聖言天啟聖心程

朱將命堙晦沒關聲聰昏明謂當後人承此遺澤孰云
剽盜資我而文肆焉多岐孰謂其一徒為瞻仰有測此
心某早躁狂若將有志中實脆屈未立以顏揆厥無成
實由貪懦時馳意去豈不自容顧念初心恍焉如失今
此闢館惟我之求講學有徒進脩有地研窮參訂亦復
有書於古遺言於今學者尚有裨益少慰此心但懼悠
悠復循前軌惟神啓迪實有臨之

與政府書

九月二十八日某再拜某自幼讀書接聞大人君子之餘論雖他無所得至如君臣之義一節自謂見之甚明其大義且勿論姑以日用近事言之凡吾人之所以得安居而暇日以遂其生聚之樂者是誰之力歟皆君上之賜也是以凡我有生之民或給力役或出智能亦必各有以自效焉此理勢之必然亘萬古而不可易而莊周氏所謂無所逃於天地之間者也某生四十三年未嘗效尺寸之力以報國家養育生成之德而恩命連至

某尚敢偃蹇不出貪高尚之名以自媚以負我國家知
遇之恩而得罪於聖門中庸之教也哉且某之立心自
幼及長未嘗一日敢為崖岸卓絕甚高難繼之行平昔
交友苟有一日之雅者皆知某之此心也但或者得之
傳聞不求其實止於蹤跡之近似者觀之是以有高人
隱士之目惟閣下亦知某之未嘗以此自居也請得一
一言之向者先儲皇以贊善之命來召即與使者俱行
再奉旨令教學亦即時應命後以老母中風請還家省

視不幸彌留竟遭憂制遂不復出初豈有意於不仕耶
今聖天子選用賢良一新時政雖前日隱晦之人亦將
出而仕矣况某平昔非隱晦者耶况加以不次之寵處
之以優崇之地耶是以形留意徃命與心違病卧空齋
惶恐待罪某素有羸疾自去年喪子憂患之餘繼以疔
瘡歷夏及秋後雖平復然精神氣血已非舊矣不意今
歲五月二十八日瘡疾復作至七月初二日蒸發舊積
腹痛如刺下血不已至八月初偶起一念自嘆旁無期

功之親家無網紀之僕恐一旦身先朝露必至累人遂遣人於容城先人墓側修營一舍儻病勢不退當居處其中以待盡遣人之際未免感傷由是病勢益增飲食極減至廿一日使者持恩命至某初聞之惶怖無地不知所措徐而思之竊謂供職雖未能扶病而行而恩命則不敢不扶病而拜某又慮若稍涉遲疑則不惟臣子之心有所不安而蹤跡高峻已不近於人情矣是以即日拜受留使者庶病勢稍退與之俱行遷延至今服療

百至略無一效乃請使者先行仍令學生李道恒納上
鋪馬聖旨待病退自備氣力以行望閣下俯加矜閔曲
為保全某實踈遠微賤之臣與帷幄諸公不同其進與
退若非難處之事惟閣下始終成就之某再拜

靜脩集卷七遺文一

欽定四庫全書

靜脩集卷八

遺文二

元 劉因 撰

碑銘

中順大夫彰德路總管渾源孫公先塋碑銘

中統元年今天子即位草昧一革古制寢復及至元改
元則建官立法幾於備矣獨御史臺未立於是今彰德
路總管孫公公亮慨然以為言不報五年以言者益衆
始立之故首以公為監察御史屢有所彈舉天子以硬

目之尋出僉山東東西道提刑按察司事臺薦其所行
知大體遷山北遼東道副使既而有今命焉予始識公
於鎮州於其言論風旨已得其所謂良御史者其子拱
與予交則又得其出處之詳者如此然於其名位赫著
子孫蕃衍則宜其必有發之者而尚未及知也一日公
使拱持書抵予曰先公以末世之孤裔奮焉為起家之
始祖使公亮輩得有所訟襲凡以予曾大父及大父勤
德利物之所致以隱不仕今已不可得而攷其迹矣而

先公則資沈驚豪宕重然諾好施予年十六七已有志
於金貞祐之變即欲應募為兵其親或難之因逃去謁
西京帥謀年以驍勇得近幸時金主南遷謀年帥欲有
所奔問而難其人公感激請行見金主於真定得報歸
往復二千里甫七日及西京內附國朝所置守帥馬侯
熟其膽略表授義軍千戶尋復董平山府甲工從軍潞
州之役力出其伯父成族兄公政子俘擄鳳翔之役太
宗詔從臣分誅居民違者以軍法論輒歎曰誠能脫衆

人死實不愛一身況主上見問必有以對而未必死耶
遂盡匿已所分者河南之役汴既降仍不聽居民自出
日餓死不可計遂請於大帥蘓布特以渾源名族如御
史雷氏同知均州樊氏張具瞻馬正卿王仲賢王祿楊
玉者數十家而出且護而歸之鄉里先夫人杜氏亦嚴
正有法平山府有妄告工人變者皆力為營捄之賴以
全活者甚衆此皆見之太常許君靖所錄行實及鄉先
賢之所撰紀而先塋下棺之碑則無以銘之惟有以待

乎子之言以信於後人也按孫氏世為州之橫山人公之魯大父某娶何氏四子慶佑慶文慶元祿和慶文則公之大父也娶趙氏有婦德生子威平平早世威即公之考也夙巧慧少出入戰陣每患世之甲冑不堅壽其婦兄杜伸則考工記所謂燕人能為函者因密得其法且能創蹄筋翎根別為之太宗親射之不少貫寵以金符故其從征邠乾諸州也見其攻拔不避矢石帝勞之曰汝縱不自愛獨不為甲冑惜乎又命諸將衣其所進

甲目之曰汝等孰所愛重諸將各以意對帝皆不之許
曰能捍蔽爾以與我國家立功名者非此人之甲耶顧
無以之對者何也復以錦衣錫之前後所領平山安平
諸工人皆俘虜之餘殆少生意數為表給衣廩子女以
勸之諸工人至今感之如父母年若干終于平陽河南
懷州順天諸路工匠都總管帝聞為嗟恨久之杜氏年
八十八下及五世孫疾公率其子拱掇振等諸孫謙諧
誼等以問見公佩金虎符拱掇皆佩金符曰吾家起寒

微今一門貴盛但當竭忠勤以報國家爾言竟卒嗚呼
當大變故夫人之與氣運而升降者以人視之非必盡
有所以致之者而其予奪之間又未必盡得其平也疑
若一出於偶然而已抑不知人之所見者以一世為終
始固不能如天之所見者之久且遠也予固知孫氏之
有以發之者也然而公未老事業尚未既而拱有才氣
謙既以能世其業而奏隸東宮而諧亦穎悟予他日又
可以攷其淺深厚薄於此也銘曰

昔龍之山有晦而淪必孫氏之先蓋有嗟其屈者謂天道之或愆今曄其華賁及邱原亦有嗟者謂賦興之或偏彼嗟者愚不究其終而不探其源孰馭龍山遊萬物巔渺下視乎神川歷百世而循一環不輕不軒而得夫造物者之權玄鐵符握黃金色寒翠屏雷裂瀚海雲翻有物蕩盡再造坤乾有惻天心莫抹其然孰其庇之孰其翼之於此時而保全乘此時而騰騫孰其誘之孰其相之人皆嗜殺我獨惕焉惟山西之名御史曰雷默與

劉雲郁乎相輝一代人文惟將作君武臣桓桓有子如
公復與雷劉之子而驄馬聯翩相彼根株有此蔓延窮
天地物極天地年又安有不定之天夏蟲疑冰孰大其
觀後之嗟者示此銘言

懷孟萬戶劉公先塋碑銘

至元十一年詔大丞相巴延領諸將兵伐宋有志之士
咸喜乘此際會思效計勇以自奮是時今懷孟萬戶劉
公潭以世襲上百戶攝行千戶事將七百人屬今尚書

右丞史公格由西道進是年渡江以攻下一堡生得將
二人攻沙市先登加忠顯校尉遷總把明年以攻下十
餘堡生得將十人攻潭州先登加昭信校尉明年以略
定柳賓邕三州生得將一人攻靜江先登賜銀符加武
略將軍為真千戶明年以攻下鬱林化二州略定廉欽
高雷四州生得安撫使二人將四人加武德將軍明年
以從平章政事阿爾哈雅過海略定瓊州降大將六人
賜金符加宣武將軍遷總管守瓊州又以略定萬安軍

攻下黎洞一百二十所降大將三人賜虎符加顯武將軍明年又以略定吉陽昌化二軍諸洞寨加明威將軍為萬戶兼安撫使鎮海招討使守瓊凡九年以民夷既定來朝京師遂加廣威將軍授今職移鎮嚴州國朝兵制尚質其將帥皆以所統戶數名故有百千萬戶三等其符節有金銀虎符亦三等又於百千之間置總把千萬之間置總管以為遷拜旌賞之漸其許佩符節子孫襲職二事則惟將帥得之故將帥在今為美官而至佩

虎符為萬戶則又為最貴矣公自以階罷至此過家上塚圖報先澤以近世多刻石先塋叙先世名跡如古先廟碑者乃再拜以事狀來請按顯曾祖考諱德安居不仕妣張氏楊氏顯祖考祁陽府君諱寶姿幹奇偉氣略過人當金貞祐主棄河朔徙都汴時有張甫者據信安武仙者據真定皆為金守易定之間大為所擾而蔡國張公柔開府滿城凡州縣來歸者皆承制封拜令各城守相為應援以禦敵乃以祁州為祁陽府令左副元

帥賈公輔行帥府和陽以府君為行府右監軍仙軍嘗
攻深澤新樂二縣府君將兵往揀大敗仙軍二縣之人
賴以安全後仙將柴姓者襲取冀州府君從張賈二公
往救之時天大雪深三尺與柴軍遇張公陷雪馬倒為
柴所逼府君以一矢斃之柴軍遂潰而張公獲免上府
君功授宣武將軍祁陽府通判再遷總管後以年老致
仕優游鄉里享年若干妣李氏楊氏姜氏顯考蒲陰府
君諱世鼎以蔭補蒲陰尉後以良家子從軍特授上百

戶戍毫嘗以主帥命將五千人攝府事攻荆山身先士卒不避矢石竟被創而廢享年若干妣齊氏張氏三世皆塋祁州蒲陰之北鄉百長原其宗支別有圖列碑陰銘曰

自北而南天開元基遼漸燕垂金莫淮夷厭分裂耶孰徹藩籬白雁一舉橫絕天池彼瘴海兮藏鯨鯢巨鬣如城兮尾如旗安得壯士兮驅而守之矯惟劉公熊羆虎貌奮髯一呼藜山為摧強黎是讎罷民之依彼祥雲瑞

日固為可喜不有風霆執行天威方挽強是賴而一字
奚施我聞瓊人劉公之思相彼甘棠根株在茲乃今燕
趙如唐山西或一矢斃敵赴主將之難或百戰致命合
荆山之圖盖三世受封而後咄咄益奇語彼瓊人有來
京師道出於祁黃蕉丹荔當一酌劉公先塋之碑

明威將軍後衛親軍總管李公先塋碑銘

至元十七年丞相巴延以舊所領諸將中四人見皇太
子曰此皆臣收江南時渡江水戰攻城略地為國家盡

力命臣所親見者是時天下事聽皇太子處置乃命四
人者無外補可使將侍衛親軍仍賜食殿中今致仕後
衛總管清苑李公其一也公便騎射材趨過人雖自幼
以宦家子從軍為將校然每喜與士大夫遊且其居近
予故聞其勲爵行事也習壬戌憲宗南征將兵隸史忠
武公至巴州能却敵攻諸柵先登至崇慶卒遇敵江漢
奪戰艦中統元年今上北征復將兵隸忠武至吉河三
年李壇叛將兵隸張勇烈公圍濟南日夜與賊戰獲賊

衆十餘人明年詔河南統軍略地荆南將勇敢分攻堅
柵多所克拔九年圍襄陽十一年丞相伐宋為衙前將
至鄂州部所將引戰艦入至郢州夜奪浮橋攻沙陽新
城二柵先登渡江將勇敢水軍首與敵遇取旗戰艦甲
仗既渡能盡却所當守岸兵復入江順流追奪至白虎
山明年取真州能退敵焚其舟時敵將夏貴水軍陣巢
湖勢不可犯能破其堅奪旗鼓戰艦取常州將勇敢先
登拔其城又略定蘇秀二州此其功憲宗時中書右丞

相公子清牒為百戶中統二年璽書遷總把錫以銀符
至元十一年軍職例加散官授敦武校尉十三年遷武
略將軍錫以金符為千戶十五年加武德將軍再加宣
武將軍為總管十七年遷明威將軍為後衛親軍總管
後創減總管復為千戶凡六被璽書再授符節憲宗南
征時詔賞白金一錠北征時今上賞錦衣一襲圍濟南
時親王為大將者賞白金半錠渡江時丞相賞馬一疋
白金一錠此其爵賞下濟南出誤為賊所汙者數十人

死拜衛率讓其同列先已最後補此其行事公知予習
聞是謂予曰凡此皆藉先世今思報效而先塋近藥縣
之臨水里考品制得樹碑願先世名行使子孫知仁祐
今日者有所自皇考諱義大元開國時從楊甲立柵保
南甲為李丙所害乃慨然以義動衆共殺丙以復所事
讎其衆遂推為長後大帥沙珠丹略地燕南乃以衆歸
之朝廷賜以璽書金符俾就領其衆為權府如古留後
天下既定乃浮沈里社年八十二終請書是為銘予按

司馬遷自序多及已蓋史家變例故公勲爵亦宜附見以榮先世公諱仁祐字安卿男一人曰元襲公職女一人嫁僉行樞密院事王公之子守銘曰

吁其好還卧榻不容白雁載飛千彬益雄有翼而從咸第其功南至於江淮北至於沙漠東至於青齊西至於巴庸惟公生平預折四衝當酹以告其先曰疇昔生男不愧矢蓬留後復讎天亦義之報不在躬彼樂幽崇龜螭而豐銘以賁之庸壽厥封

正議大夫禮部尚書王公神道碑銘

公本東萊王氏其大父曰溫娶周氏生永福多有才遠
識見金末亂避地徙燕慕陶朱公為人用其道以富天
下既定遂列名莊聖皇太后封邑籍中後被教主管都
城課稅比五品京官實為宛平王氏始祖娶某氏生公
中統初選良家子入侍東宮公甫弱冠儀觀甚偉氣宇
粹然太保劉公秉忠見而器之引以與選服勤守恪漸
致近密有詔皇太子裁決天下事凡時政所急民瘼所

係知無不言是時宮職未備而湯沐分邑地廣事繁當有攸屬乃拜公正議大夫工部尚書行本位下隨路民匠都總管及詔立東宮官屬為家丞蓋令署帝鄉貴臣故以公為貳又別置儲用司掌貨幣出內以公廉悉特令兼之前後所蒞咸以精飭事治獲嘉獎後以病辭職不許辭不已逾年乃許仍令食祿如故復上言既不事而祿食臣心誠所未安又不許面陳其不可至於再三方許至元廿六年皇孫出鎮懷孟天子重其事選及

侍東宮舊臣老成練達者護之以行公乃行陞辭天子
目之良久以為得人營幕所在軍政肅然未幾召還廿
八年天子更易大臣一新時政詔求才可用而久不仕
者羣臣咸舉公拜禮部尚書復以病辭皇太子妃召問
曰人皆欲進卿獨求退何也對曰臣見宮庭舊人如臣
等輩十去八九臣蒙恩最厚願留侍皇孫脩宿衛更直
實不忍去聞者莫不嗟勸明年薨問疾給葬故事畢舉
既葬詹事張九思曰公從事東宮三十餘年小心慎默

無少玷缺而其辭受去就之間風義凜然有可激勵後世者不可不書其神道宜有碑碑宜得劉某銘其孤鵬持集賢直學士趙孟頫所撰行狀來請公予所知資孝友為人誠實樂易讀書務躬行不徒事章句其居家教子撫孤嫠恤宗族秩然有序銘固無愧公諱倚字輔臣其夫人張氏薊州節度使滋之女九思姊也內助成家其子男二人鵬為長朝列大夫異樣總管府總管秩視九卿鵬讀書未仕女三人長適鷹坊總管韓某之子某

次適集賢學士劉慙之子庶次適夫人之族子謹其孫
男一人遂初女一人幼其壽五十三其薨之日正月戊
申其葬之日二月甲申其所葬在廬師山下銘曰

正從惟一 是為臣則偉公得依確乎不移初仕東朝曰
勤汝嘉允惟帝卿來視予家身方病休心未臧免鶴駕
仙遊鸞聲未遠帝曰予孫往藩予懷疇咨家老作傳惟
諧還歸幾時乃卿於禮難忘本初臣心安此嗚呼忠哉
茲惟公墟吉寶銘之過者勿驅

澤州長官段公墓碑銘

公諱直字正卿姓段氏世為澤州晉城人少英偉有識慮甲戌之秋南北分裂兩河山東郡縣盡廢兵凶相仍寇賊充斥公乃奮然興起率鄉黨族屬為約束相聚以自守及天子命太師以王爵領諸將兵來略地兩河山東豪傑並應公遂以衆歸之事定論功行賞分土傳世一如古封建法公起澤應得澤遂佩黃金符為州長官凡廿餘年方天下初集國家以澤衝隘別置守兵主將

不善制御恣其侵暴久之山民不勝其橫往往自棄為
羣盜公上言願罷守兵請身任諸隘保其無虞朝廷從
之羣盜遂息公見澤民避兵者多未復乃籍其舍業於
其親戚鄰人戶末約曰俟主還與之戶如故分出賦如
業是以民多還集但戶額少而丁業優故賦輕而易足
兵後屢饑其還民無產者復不能自生公為出粟食之
不使流散時新法藏亡甚嚴鄉民不一一曉知澤當諸
軍往來之衝病俘多亡留民家者若以藏論籍沒從坐

保伍為空公乃豫為符券為官使收養以俟諸軍物色者後凡留俘家皆得以不藏釋州民被俘他郡者公多為購得之兵死暴露者公必為收瘞之當大變之餘兵氣未已生意未復而澤風翕然已為樂土矣公又大修廟學堂筵齋廡庖厨惟脩仍割負郭良田千畝購書萬卷以給之州人李俊民在金時以明經為舉首後國朝亦被累徵賜號莊靜先生盖有道之士也是時方避地河南隱約自處公迎而師之凡澤之名士散在四方者

亦必百方招延必至而後已故不五六年州之學徒通
經預選者百廿有二人時今上在潛邸有以公興學禮
士聞者嘉之特命提舉本州學校事未拜而公卒年六
十五子紹隆嗣後三十開年紹隆遣其子倪從事李蕢
持公行狀及莊靜所作州學記造某所蕢贊倪代紹隆
拜曰請先生銘先公子按傳記初澤俗淳朴民不知學
至宋治平中明道程先生為晉城三年諸鄉皆立校暇
時親至為正兒童所讀書句讀擇其秀異者為置學舍

糧具而親教之去邑經十餘年服儒服者已數百人由是盡宋與金澤恒號稱多士故公雖不學起行間然其生長見聞必有起其趨向者故當用武之際獨能以立學為敦勸修舉使前賢數百年之遺風不遂廢墜謂倪乃祖用是當銘倪應曰諾謹拜銘之賜公考諱順妣趙氏夫人衛氏勤儉有禮公既一意公事凡其所以成家教子者咸內助之力也張氏馮氏李氏亦皆賢淑子男四紹隆令以遷轉法行加武略將軍移知葭州國初凡

守親王分地者一子當備宿衛紹先宿衛王府紹相早卒紹宗未仕女一適裴氏孫男六倪儀信傑佐仁女四長早卒次適何氏郭氏李氏卒於甲寅六月三日而葬葬建興鄉沙城里先塋公平生朝京師一朝王二王寵賜甚渥初太師承制封拜時授潞州元帥府右監軍云銘曰

天荒澤方庸試程氏邦家幾時春風百世生為俊民為幸已多矧嗣守土公如幸何以富以教循序無盡公焉

取斯承此餘潤公生閔勞謂樂斯驕閱其堂中皤然盖
公公生用武謂如貌虎跡其嬉遊泮水優柔魯城絃歌
不以兵壞既安既寧宜爾多賴不遠公阡大刻銘詩於
乎澤人勿替爾思

靜脩集卷八

遺文二